

[72] CHAPITRE V.

DU BAPTESME D'VN HURON EN LA RESIDENCE DE
SAINCT IOSEPH PROCHE DE KEBEC.

LE Pere Iean de Brebeuf estant descendu des Hurons avec le Pere François du Peron, fut conduit iusques à Kebec par des Sauuages, en partie Chrestiens, en partie Catechumenes, il y en auoit vn de consideration, homme de bon sens, fils du Capitaine de la Bourgade; mais comme en ces quartiers là, les enfans ne succedent pas à leurs peres dans ces charges honorables, si bien les neueux du costé de la sœur: cét homme mene vne vie priuée en son païs, neantmoins comme il est adroit, & reconnu pour vn homme d'esprit, il est écouté & bien voulu de ses Compatriotes. Monsieur le Cheualier de Montmagny ayant appris de la bouche du Pere de Brebeuf, les belles qualités de ce bon Catechumene, demanda si on ne [73] le pouuoit pas bien baptiser deuant son depart, le Pere repartit que ce bon-homme n'auoit pas de plus ardens desirs, qu'on ne le retardoit que pour l'éprouuer dauantage: Iamais, difoit le Pere, il n'a combatu formellement la foy. Au plus fort de nos perfecutions, lors qu'on nous banniffoit de tous costés, & que les portes des cabanes, & l'entrée des Bourgades nous estoient fermées, il nous receuoit charitablement, & nous permettoit de faire baptiser, non pas seulement ses parés, mais encor ses propres enfans; ce Printemps dernier, il a ietté au feu les forts qu'il